

Illerfinnik angerlaassilluni assartuinnermut ikiorserneqarsinnaanermut piumasaqaatinik illuinnaasiunngitsunik aalajangersaalluni pisortanit ikiorsiissutit pillugit malittarisassat atuuttut allanngortinneqarnissaannik siunnersuummik Naalakkersuisut kingusinnerpaamik UPA2020-mut saqqummiussaqaarnissaannik Inatsisartut aalajangiiffigisassaattut siunnersuut.

(Inatsisartunut ilaasortat, Aqqaluk Heilmannimit, Atassut, saqqummiunneqartoq, Inatsisartunut ilaasortamit Inatsisartut Siverth K. Heilmann, Atassut, tiguneqartoq)

pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini makku ilaasortarai:

Inatsisartunut ilaasortaq Laura Táunâjik, Siumut, siulittaasoq
Inatsisartunut ilaasortaq Stine Egede, Inuit Ataqtigiit, siulittaasup tullia
Inatsisartunut ilaasortaq Karl-Kristian Kruse, Siumut
Inatsisartunut ilaasortaq Nivi Olsen, Demokraatit
Inatsisartunut ilaasortaq Malene Vahl Rasmussen, Demokraatit
Inatsisartunut ilaasortaq Mikivsuk Thomassen, Inuit Ataqtigiit
Inatsisartunut ilaasortaq Aqqa Samuelsen, Inuit Ataqtigiit

UPA 2019-imi ulloq 10. april 2019-imi siullermeerinninnerup kingorna ataatsimiititaliap siunnersuut sukumiisumik misissorpaa.

Siunnersuutip imarisaa siunertaalu

Pisortanit ikiorsiissutit pillugit malittarisassat allanngortinneqarnissaannik siunnersuuteqartoq taparserneqarnissaminik kissaateqarpoq, taamaaliornikkut piviusumik tunngaveqarneq aallaavigalugu ilisisussaatilluni illerfimmik illoqarfigisamut angerlaassinissamut angallassinermi ikiorsiisoqarsinnaaqullugu.

Siunnersuutip Inatsisartunit siullermeerneqarnera

Siullermeerinermi siunnersuut Inatsisartunit tamakkiisumik tapersersorneqanngilaq, naak matumani pisortat ikiorsiissutigisartagaannut atatillugu malittarisassat ataatsimut isigalugu nalilersuisoqarnissaa naatsorsuutigineqassasoq Naalakkersuisunit kallerriutigineqarmat. Siunnersuummik siullermeerinermut atatillugu ilaatigut illerfimmik illoqarfigisamut angallassinissamut tapiissuteqarnissamut tunngatillugu napparsimasoq katsorsartikkiartorluni peqqinnissaqarfimmit aallartinneqarsimatillugu pissutsit eqqartorneqarput.

Ataatsimiititaliap siunnersuummik suliarinninnera

Siullermeerineq aallaavigalugu siunnersuummik matuminnga akuersineq qanoq kinguneqassanersoq ersarissisissallugu pingaaruteqartoq ataatsimiititaliaq isumaqarpoq.

Tak. pisortat ikiorsiissutaa pillugu nr. 15, 20. november 2006-meersoq kingusinnerusukkullu allanngortinneqartoq tunngavigalugu illerfinnik angerlaassinermut tapiissutinik qinnuteqartoqarsinnaavoq.

Peqqussummi § 23, imm. 1-3-mi ima allassimasoqarpoq:

§ 23. Kommunalbestyrelsi ilisinermit aningaasartuutinutnaleqquttunut matussutissanik pisortanit ikiorsiisnaavoq, aningaasartuutit pigisanit akilerneqarsinnaasimangippata toqusullu piumasaqaatit § 4-mi imm. 1 naammassisimappagu.

Imm. 2. Pineqartoq Kalaallit Nunaanni illoqarfigisami nunaqarfigisamiluunniit kingullermik najugaqarfigisami avataani toqusimappat, toqusullu pigisaasa imaluunniit qanigisaasut aningaasartuutit akilersinnaanngippatigit, kommunalbestyrelsi illerfiup angallanneranut ikiorsiissuteqarsinnaavoq, toqusimasullu § 4 imm.1-mi piumasaqaataasut naammassisimappagit

Imm. 3. Illerfiup angallanneqarneranut aningaasartuutaajumaartussat aaliangeruminaatsinneqarpata, taamaanneranilu illerfiup angallanneqarneranut ikiorsiisoqarsinnaatillugu, kommunalbestyrelse ikiorsiissutitut siumoortumik akiliutissamik tunniussisnaavoq. Aningaasanik tiguisup tigusermini atsiornermigut uppernarsassavaa, ikiorsiissutip utertinniarneqarsinnaanera. Pigisat nalgisa nalunaarsornerat naammassineqareerpat aningaasartuutit aaqqivigineqassapput.

Siunnersuummut taasissutissami tunngavilersuummilu siunnersuutip ilusimisut iluseqartillugu akuerineqarneratigit Naalakkersuisut makkuninnga suliakkerneqassasut paasinarsivoq:

- Illerfinnik illoqarfigisamut angallassinermut tapiissutinik kommunit tapiisarnerat pillugu piviusumik tunngaveqarluni aalajangersaanissamut qulakkeerinissaq

siunertaralugu siunnersuummik saqqummiussaqaarnissaq.

- Siunnersuut ima ilusilerneqassasoq, innuttaasut ataasiakkaat tapiiffigineqarnissaminut qanoq pisinnaatitaaffeqaarnertik pillugu annertunerusumik paasisaqaarnissaminut siumut ilisimasaqaarnerulernissaminut periarfissaqaarnerulersinnaaqullugit.

Akerlianilli siunnersuummik akuersissutiginninneq Naalakkersuisut makkuninnga suliakkersorneqaarnerinik kinguneqassanngilaq:

- Innuttaasut illerfinnik illoqarfigisamut angallassinernut tapiiffigineqarnissamut periarfissaat allanngartissallugu.
- Innuttaasut ataasiakkaat illerfimmik illoqarfigisamut angallassinerni tapiissutit annertussusaat allanngartissallugu.
- Illerfiit illoqarfigisamut angallanneqaarnerinut pisortat tapiissutaasa siunertaa allanngartissallugu.
- Kikkut tapiissutisinissamut eqqarsaataasut tunngavigalugit kikkut taperneqarsinnaanersut allanngartissallugu.
- Toqusoq napparsimalluni katsorsartinninni imaluunniit assingusumik pissuteqartumik illoqarfigimmi allamiikkaluartoq pisortat illoqarfigisamut illerfimmi tapiissuteqarneq ajornerat allanngartissallugu.

Naalakkersuisut akissuteqaataanni ima allassimasoqarpoq:

(Ataatsimiititaliap erseqqissanera)

*"Malittarisassat atuuttut malillugit, inuit illoqarfinni assigiinngitsuni najugallit assigiinnilli isertitatigut atugallit assigiinngitsunik aalajangiiffigineqartarsinnaapput. Taamaattoq angerlarsimaffiup qanoq ungasitsiginera apeqqutaalluni illerfinnik angerlaassilluni assartuineranut aningaasartuutit allanngorarsinnaaneri eqqarsaatigineqassapput, taamaattumik piumasaqaatit qulaani pineqartut malillugit nalilersuineq innunut assigiinnik isertitalinnut assigiinngitsunik inerniliisoqarsinnaaneranik kinguneqarsinnaavoq. **Illerfimmik angerlaassilluni assartuineranut toqusup pigisaasa nalingi qaniginerpaasalluunniit aningaasartuutininik matussusiisinaanerat aalajangiisuussapput.***

Taaguutilli "ilaqutariit" qanoq paasineqarnissaanut nalornisoqarsinnaanera miserratigineqanngilaq, taamaattumik Naalakkersuisut siunnersuut manna tunuliaqutaralugu ilitersuummi piaartumik erseqqissarusuppaat, ilaqutariit tassaasut kingornussisussat. Taamaalilluni erseqqissumik allassimassaaq, assersuutigalugu qatanngutaata aningaasaqarnera eqqarsaatigineqassanngitsoq kingornussisussaataasumik katissimasamik aappaqarpat."

(Ataatsimiititaliap erseqqissaanera)

Innuttaasut assigiinngitsut assigiinngitsunik taperneqartarnerannut illerfinnik illoqarfigisamut assartuinermi ingerlaarfiup ungasissusaalu allanngorartarnerat apeqquataalluni akit allanngortarnerisa apeqquataasarnerat peqquataasarnera pillugu Naalackersuisut ataatsimiititaliamit isumaqatigineqarput. Tamatumunngali atatillugu ataatsimiititaliamit oqaatigineqassaaq, siunnersuut ajornartorsiutaalersussaannngimmat imaluunniit aningaasat annertussusissaannut aalajangersaasussaannngimmat.

Taamatuttaarlu Naalackersuisut akissuteqaamminni allappaat oqaaseq "ilaqutariit" nalorninarsinnaammat. Iitserasuutit erseqqissaavigineqarnerisigut ajornartorsiutaasoq taanna Naalackersuisunit iluarsiniarneqartoq ataatsimiititaliamit maluginiarneqarpoq.

Soorlu Naalackersuisut namminneq oqaatigigaat, illerfiup illoqarfigisamut angallanneqarnerani ilaqutaasut aningaasaataat amerlavallaarnerannik kommunit ataasiakkaat *qaqugukkut* naliliisarnersut innuttaasunit ataasiakkaanit siumut ilisimareerneqarneq ajortoq. Taamaalilluni inatsit atuuttoq aallaavigalugu illerfiup angallanneqarneranut kommuni qanoq ilinikkut tapiisassanersoq tunngaviusumik kommunit namminneq aalajangersarsinnaavaat. Assigiissitsinissaq tunngavigalugu kommuninit tunngavissatut atorneqartut kommunini innuttaasunut tamanut assigiittariaqarput – tamannali innuttaasunit ataasiakkaanit nakkutigineqarsinnaanngilaq. Taamaalillunilu illerfiit illoqarfigisamut angallanneqarnerani pisortatigut ikiorsiissutisinnissamat periarfissat innuttaasunit ataasiakkaanit siumut ilisimaneqareersinnaanngillat.

Ataatsimut isigalugu innuttaasut tamarmik sumi najugaqarneq apeqquataatinnagu tapiissutisinnissamat nalilivigineqartarnerannut tunngatillugu assigiimmik suliarineqartarnissaat tapiissutillu annertussusaat pinnagu annertunerusumik isumannaarneqarnissaa kissaatigineqartoq siunnersuummi pineqarpoq. Illerfinnik illoqarfigisamut angallassinermi tapiissutinik pisinnaatitaanerup kommuninut killigitat akimorlugit assiginnerulernissaasa qulakkeerneqarnissaat pineqarpoq.

Siunnersuutip siullermeerneqarnerata kingorna sapaatip akunnerani tulliuttumi pisortatigut ikiorsiissutit pillugit inatsisip suliareqqinneqarnera pillugu ilaatigut kommuninik ataatsimeeqateqassasoq Naalackersuisut ilisimatitsissutigaaq. Siunnersuummi matumani ajornartorsiutinut atatillugu killiffik pillugu kiisalu pissarsissutaasimasut pillugit siunnersuutip aappassaaneerneqarnerani Naalackersuisut nassuiaateqaqqullugit ataatsimiititaliamit qinnuigineqarput.

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasatigut allaffissornikkullu kingunerisassai siunnersuummut tunngavilersuutitut allanneqassasut.

Siunnersuut ilusimisut iluseqartillugu akuerineqassappat inatsisissamik piareersaalluni suliaqarnermi katillugit 250.000 kr.-inik aningaasartaqassasoq siunnersuummi allassimasoq ataatsimiititaliamit tusaatissatut tiguneqarpoq.

Ataatsimiititaliap inassuteqaatai

Allassimasut Naalakkersuisuniillu sulianik ingerlatitsoqarnera tunngativalugu ataatsimiititaliap isumaqatigiittup siunnersuut itigartitsissutigaat.


Taama oqaaseqarluni isumaliutissiisumilu allassimasunut paasinnilluni ataatsimiititaliap siunnersuut aappasaaniigassanngortippaa.



Laura Táunâjik
Siulittaasoq



Stine Egede
Siulittaasup tullia



Karl-Kristian Kruse




Nivi Olsen



Malene Vahl Rasmussen



Mikivuk Thomassen



Aqqa Samuelson